

Urmendi 0-3 herri proiektua bizirik!

Gaur arratsaldean Oiartzungo plazan aurkeztu dugun “Urmendi beti herri. 0-3 bizirik!” herri plataformako kideok hartuko dugu orain hitza, gure egunerokoa astindu duen berriaren aferaren aurrean adierazpen kolektibo hau plazaratzeko.

Herriaren ondare kuttuna da Urmendi haur eskola. Ikasle ohi bezala, guraso, ahaide, eta herritar bezala, harrotasun handiz bizi dugu Urmendiko hezitzaileek urteetan zehar testuinguruarekin hartu-emanetan poliki-poliki ehuntzen joan diren proiektuaren parte izatea.

Larria da Urmendiko hezkuntza komunitatea osatzen dugun herritarron ikuspegitik Eusko Jaurlaritzaren jokaldi politiko hau, **publikotasunaren defentsan** herritarron beharretatik aldentzen den publikotasun eta kudeaketa eredua ezarri nahi duelako. Izan ere, Urmendi altxorra dela diogu, eta ez bakarrik aurrera daraman proiektu pedagogikoagatik; baita kudeaketa ereduagatik ere: Udalak, hau da, herritarrengandik gertuen dagoen instituzio publikoak kudeatzen duelako proiektua hezkuntza komunitatearekin batera. Eta guk, herritarrok urte luzez ikusi dugu gertuen dugun instituzio publikoarekin elkarlanean jarduteak zein onura dituen. Ez gara ezer berria sortzeaz ari, ezin hobeto funtzionatzen duen kudeaketa eredu batez ari baikara. Zertarako zentralizatu kudeaketa erabat Eibarren Haur Eskolen Partzuergoaren egoitzan jadanik hemen bertan, herritik eta herriarentzat, 27 urteko ibilbide eta praktika arrakastatsu baten jabe bagara?

Ez gara errepikatzeaz aspertuko: Lehen haurtzaroaren ezaugarriak eta garrantzia jendarteratzen lan nekazina egin du Urmendik bere ibilbide luzean. Bizitzako lehen zikloaren duintasuna, egunez egun, umiltasun handiz defendatu duen proiektu pedagogikoa da, erakutsiz 0-3 urteen garapen zikloa identitate propioa duen urrezko bizi etapa dela, berariazko zainketa eta akonpainamendua eskatzen dituen haurra osasuntsu eta osoki garatzeko.

Horrez gain, elkarbizitzaren eta ongizate sozialaren alde izugarritzko ekarpena egiten du Oiartzunen, pertsonak eta zaintza haien logika eta jardunaren erdigunean jartzea egiazki lortuz. Eta hori, hain zuzen ere, gure publikotasun

ereduan gakoa iruditzen zaigu. Gure publikotasun ereduak ez baitago korporazio handien mesedera begira. Gure publikotasun ereduak ez baitu ekonomia pertsonen ongizatearen gainean lehenesten. Gure publikotasun ereduak komunitarioa da, eta Urmendi bezalako azpiegitura sozialak sustatu eta politiken erdigunean kokatu behar direla aldarrikatzen du. Gure publikotasun ereduak bizitzak eta pertsonak lehenetsi nahi ditu politika neoliberalen aurrean.

Izan ere, Urmendi proiektuak guzti hori barnebiltzen du: esperantza ereiten duen proiektua da herritarrontzat, komunitatea eraikitzen duena, familiak emozionalki lagunduz eta zaintza eta heziketa praktikan ahalduz. Gainera, haur bakoitzak gerora egingo duen hezkuntza proiektuaren ibilbidearen gainetik, Urmendi familia guztien aterpea da.

Kalitate pedagogiko hau ahalbidetu du, dudarik gabe, herri proiektu lokal bezala izan duen autonomiak eta garapenak, ekipo pedagogikoaren kohesioak eta jarraikotasunak, eta nola ez, kalitatezko zerbitzu bat eskaintzeko Urmendiko profesionalek erakutsi duten konpromisoak.

Garapen honek guztiak Eusko Jaurlaritzarentzat ere eredugarri behar luke izan gure ustez, eta aztertu beharko lukete zergatik den hain arrakastatsua proiektua, beste herri eta txoko batzuetara zabaldu ahal izateko eta hezkuntza esparrua aberasteko. Horregatik ez dugu ulertzen aldebakarrez eta inposaketaren bidez Udal haur eskolari dirulaguntzarik ez emateko erabakia hartu izana, horrek halako harribitxia haustea dakarrelako, zentralizaziora eta homogeneizaziora bultzatuz eta etorkizuna arriskuan jarriz.

Hemen gauden guztiok ibilbide oparoa desio diogu aurrerantzean ere Urmendi 0-3 proiektuari eta espero dugu bestelako elkarrizketa eta adostasun bat bideratzeko maila politikoa erakutsiko duzuela hemen zaudeten EHBilduko eta EAJko zinegotziek. Heldu diezaiozun afera honi elkarrekin Hezkuntza sailaren aurrean herri gisa, herritarrontzat onena den publikotasun eredu propioa mahai gainean jartzeko.

URMENDI BETI HERRI!

URMENDI AURRERA!

URMENDIKO LANGILEEKIN ELKARTASUNA!